

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI

Broj: 32 0 St 425715 22 St
Tuzla, 20.09.2022. godine

OPĆINSKI SUD U TUZLI, sudija Arnaut Faruk, u postupku predhodnog ispitivanja prijedloga za otvaranje stečajnog postupka nad dužnikom i protivnikom predlagača "Finish profiles" d.o.o. Gradačac, Ledenice Donje bb podnesenog od strane povjerioca i predlagača "FINISH PROFILES" BV IJsendijkstraat 383, 1422 LB Purmerend, Kraljevina Nizozemska, zastupanog po punomoćniku Enveru Ćosićkiću advokatu iz Tuzle, dana 20.09.2022. godine donio je slijedeće,

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva "Finish profiles" d.o.o. Gradačac, Ledenice Donje bb.

Za privremenog stečajnog upravnika imenuje Emir Mehurić iz Gračanice.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- **obezbijediti imovinu dužnika i starati se o istoj,**
- **ima ovlašćenja da uđe u poslovne prostorije dužnik i provede neophodne radnje,**
- **utvrditi da li postoji razlog za otvaranje stečajnog postupka,**
- **ispitati da li će imovina stečajnog dužnika pokriti troškove stečajnog postupka,**
- **utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i**
- **uraditi kontrolu poslovanja stečajnog dužnika.**
- **kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.**

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama

i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Gradačcu i Službi za geodetske i imovinsko-pravne poslove Grada Gradačac, radi upisa zabilježbe otvaranja prethodnog postupka.

O b r a z l o ž e n j e

Predlagač "FINISH PROFILES" BV IJsendijkstraat 383, 1422 LB Purmerend, Kraljevina Nizozemska kao povjerilac, zastupan po punomoćniku Enveru Ćosićkiću advokatu iz Tuzle, podnio je dana 24.05.2022. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika, pri tome učinivši vjerovatnost svog potraživanja dostavljanjem nepravomoćne sudske presude kojom potražuje novčane iznose od društva dužnika .

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1.,2. i 3. Zakona o stečaju i da je isti dopušten, dana 14.09.2022. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač "FINISH PROFILES" BV IJsendijkstraat 383, 1422 LB Purmerend, Kraljevina Nizozemska je dana 15.09.202. godine dostavio sudu dokaz o uplati predujmljenih sredstava za finansiranje prethodnog postupka u iznosu od 4.000,00 KM.

Na osnovu priložene dokumentacije i to: analiza protoka novca za dužnika ili drugi dokaz o nesolventnosti društva (izvještaj o računima dužnika izdat o Centralne banke BiH) na dan 15.06.2022. godine, Aktuelni izvod iz sudskog registra za dužnika od 15.06.2022. godine, presuda općinskog suda u Tuzli u predmetu broj: 32 0 Ps 353356 19 Ps od 12.11.2021. godine., predlagač je učinio vjerovatnim platežnu nesposobnost i potraživanje predlagača.

Na ročištu za saslušanje po prijedlogu za otvaranje stečaja, održanog dana 14.09.2022. godine, koje je održano u prisustvu predlagača i odsustvu uredno obavještenog protivnika predlagača, punomoćnik predlagača Enver Ćosićkić advokatu iz Tuzle je izjavio da je učinio vjerovatnim svoje potraživanje dostavljanjem presude općinskog suda u Tuzli, po kojoj protivnik predlagača duguje iznos od 94.233,51 KM, a platežnu nesposobnost predlagač dokazuje dostavljanjem podataka iz jedinstvenog registra računa kod Centralne Banke BiH na dan

15.06.2022. godine, iz kojeg proizilazi da je račun otvoren kod Poštanske banke AD Banja Luka ugašen dana 24.01.2014 godine. Budući da protivnik predlagača nije izmirio svoju dugovanu obavezu, te da po mišljenju predlagača istu nije u stanju izmiriti, predlaže da sud rješenjem odredi predujam za otvaranje prethodnog postupka, u cilju ispitivanju uslova za otvaranje stečaja.

Na osnovu podnesene dokumentacije i iskaza punomoćnika predlagača kao povjerioca, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Sl. novine F BiH“, br.53/2021.).

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

SUDIJA
Faruk Arnaut

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od petog dana od dana objavljivanja u „Sl. Novinama FBiH“ . Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.